

## **Rā 4, Te Whānautanga o tō tātou Ariki – Rāapa/Wenerei i te ahiahi**

*He Karakia mō ngā Rāapa/Wenerei o te "Wā Noaiho", o ia rā rānei o te wā o te Whānautanga*

I haere mai te Kupu ki tōna kainga ake, ā, kihai tōna iwi ake i mōhio ki a ia. Tēnā ko te hunga i manako ki a ia, i whakapono ki tōna ingoa, i hoatu e ia te mana ki a meinga rātou hei tamariki mā te Atua.

*Hoani 1.11-12*

E te Atua kai hanga i ngā mea katoa  
Nāu i hanga mātou kia rite ki tōu te āhua  
I tonoa mai e koe tāu tama  
Hei whakaora i a mātou e taka nei ki te hē  
Māu anake ka ora mātou e taurimatia nei  
I roto i tō mātou tamarikitanga  
I mea koe, no te pēnei te rangatiratanga o te rangi.  
I whai wāhi ai mātou i roto i a koe. **Āmine.**

### **Te Kupu a te Atua**

*Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei, **Korōria ki . . .***

### **Te Rāwhitu tuatahi, me ngā Rātapu o te Whānautanga, Waiata 110**

- 1 I mea a Ihowā ki tōku Ariki, •  
“Hei tōku matau koe noho ai, kia meinga rā anō e ahau ōu hoariri hei tūranga waewae mōu.”
- 2 Mā Ihowā e tonoa mai te tokotoko o tōu kaha i Hiona; •  
hei rangatira koe i waenganui i ōu hoariri.

- 3 Ka kakama tōu iwi ki te tāpae atu i a rātou i te rā o tōu kaha, •  
i te ātaahua o ngā mea tapu. Nō te kōpū mai o te ata, kei a koe te tōmairangi o tōu whanaketanga.
- 4 Kua oati a Ihowā, e kore anō tāna e puta kē; •  
“Hei tohunga koe ake ake, nō te tikanga o Merekihereke.”

**Te Rāwhitu tuarua, me ngā Rāhina/Mane o te Whānautanga, Waiata nā 89**

- 1 Ka waiatatia e ahau ngā mahi tohu a Ihowā ake ake; •  
ka whakapuakina e tōku māngai tōu pono ki ngā whakatupuranga katoa.
- 2 I mea hoki ahau, “Ka hangā ake te mahi tohu mō ake tonu atu; •  
ka whakapūmautia e koe tōu pono ki ngā tino rangi rā anō.
- 3 “Kua whakarite kawenata ahau ki tāku i whiriwhiri ai; •  
kua oati ki tāku pononga ki a Rāwiri;
- 4 ‘Ka pūmau i ahau ōu uri ake ake; •  
ka hangā tōu torōna ki ngā whakatupuranga katoa.’ ”
- 20 “Kua kitea e ahau tāku pononga, a Rāwiri; •  
kua whakawahia ia e ahau ki tāku hinu tapu.
- 21 Ka ū atu tōku ringa hei āwhina mōna; •  
mā tōku takakau anō ia e whakakaha.
- 22 E kore te hoariri e whai wāhi ki a ia; •  
e kore anō hoki te tama a te kino e tūkinu i a ia.
- 23 Māku e tukituki ōna hoariri ki tōna aroaro; •  
ka whiua e ahau te hunga e kino ana ki a ia.
- 24 Otirā, ka mau ki a ia tōku pono me tāku mahi tohu; •  
ā, mā tōku ingoa ka ara ai tōna haona.

- 25 Māku anō tōna ringa ka pā ai ki te moana; •  
tōna matau ki ngā awa.
- 26 Ka karanga ia ki ahau, 'Ko koe tōku Pāpā, tōku  
Atua, •  
te kōhatu o tōku whakaoranga.'
- 27 Ka waiho anō ia hei mātāmua māku •  
ki runga ake i ngā Kīngi o te whenua.
- 28 Ka rongoātia e ahau tāku mahi tohu mōna ake tonu  
atu; •  
ka mau tonu tāku kawenata ki a ia.
- 29 Ka meinga hoki e ahau ōna uri kia mau tonu ake ake,  
•  
tōna torōna ānō ko ngā rā o te rangi."

**Te Rāwhitu tuatoru, me ngā Rātū/Tūrei o te  
Whānautanga, Waiata 96**

- 1 Waiatatia he waiata hou ki a Ihowā; •  
waiata, e te whenua katoa, ki a Ihowā.
- 2 Waiata ki a Ihowā, whakapaingia tōna ingoa; •  
whakakitea tāna whakaoranga i tēnei rā, i tēnei rā.
- 3 Whakapuakina tōna korōria i waenganui i ngā  
tauiwi, •  
āna mahi whakamīharo i waenganui i ngā iwi katoa.
- 4 He nui hoki a Ihowā, he tika anō kia nui te  
whakamoemiti ki a ia; •  
kia wehingia nuitia ai i ngā atua katoa.
- 5 He whakapakoko hoki ngā atua katoa o ngā iwi; •  
nā Ihowā ia i hanga ngā rangi.
- 6 He hōnore, he korōria kei tōna aroaro; •  
kei tōna wāhi tapu te kaha me te ātaahua.
- 7 Waiho atu i a Ihowā, e ngā hapū katoa o ngā iwi; •  
waiho atu i a Ihowā te korōria me te kaha.

- 8 Waiho atu i a Ihowā te korōria e tika ana mō tōna ingoa; •  
maua mai he whakahere, haere mai hoki ki ōna marae.
- 9 Koropiko ki a Ihowā i roto i te ātaahua o te tapu; •  
kia wehi rā ki tōna aroaro, e te whenua katoa.
- 10 Mea atu i waenganui o ngā tauiwī, “E kīngi ana a Ihowā!” •  
Ka ū te whenua, tē taea te whakangāueue; ka tika āna whakawā mō ngā iwi.
- 11 Kia hari ngā rangi, kia koa te whenua, •  
kia haruru te moana, me ngā mea e hua ana i roto.
- 12 Kia hari te māra, me ngā mea katoa i runga. •  
Ko reira anō, koa ai ngā rākau katoa o te ngahere;
- 13 ki te aroaro o Ihowā, e haere mai ana hoki ia; e haere mai ana ia ki te whakawā mō te whenua. •  
Ka whakawā ia mō te ao i runga i te tika, mō ngā iwi hoki i runga i tōna pono.

**Te Rāwhitu tuawhā, me ngā Rāapa/Wenerei o te Whānautanga, Waiata 45**

- 1 E pupuke ake ana te mea pai i roto i tōku ngākau: •  
ka kōrerotia e ahau āku i tito ai mō te kīngi; he pene tōku arero nā te kaituhituhi hohoro.
- 2 Engari koe he ātaahua i ngā tama a te tangata; •  
kua ringihia ōu ngutu ki te āhuareka; nā reira i manaakitia ai koe e te Atua ake ake.
- 3 Whītikiria tāu hoari ki tōu hūwhā, e te Nui Rawa, •  
tōu korōria me tōu hōnore.
- 4 Aratakina hoki tōu hōiho i runga i tōu hōnore, i te kaha, hei mea hoki mō te pono, mō te māhaki, mō te tika, •  
ā, mā tōu matau koe e whakaako ki ngā mea

whakamataku.

- 5 He koi āu pere; ka hinga ngā iwi ki raro i a koe; •  
kei roto rātou i te ngākau o ngā hoariri o te kīngi.
- 6 He pūmau, e te Atua, tōu torōna ake ake; •  
he hēpeta tika te hēpeta o tōu kīngitanga.
- 7 Kua aroha koe ki te tika, kua kino ki te hara; •  
nā reira, nui atu i tō ōu hoa te whakawahinga a te  
Atua, a tōu Atua i a koe ki te hinu o te hari.
- 8 Ko tōu kākahu katoa he kakara maira, he aroe, he  
kahia. •  
Ko ngā mea aho, whakatangitangi o ngā whare rei  
nāna koe i whakaahuareka.
- 9 Kei roto i āu wāhine hōnore ngā tamāhine kīngi; •  
kei tōu matau te kuīni e tū ana, nō Ōpira te kōura.
- 10 Whakarongo, e kō, titiro, tahuri iho tōu taringa; •  
ā, kia wareware koe ki tōu iwi, ki te whare anō o tōu  
pāpā.
- 11 Pēnei ka matenuitia e te kīngi tōu ātaahua; •  
ko ia hoki tōu Ariki; ā, me koropiko ki a ia.
- 12 Ko reira anō te tamāhine o Tāira me te ohaoha; •  
ka whai anō ngā tāngata taonga o te iwi kia  
manakohia e koe.
- 13 Kei roto te tamāhine a te kīngi, he korōria kau, •  
he mea whakairo ki te kōura tōna kākahu.
- 14 He mea whakapaipai ki te ngira tōna kākahu e kawea  
ai ia ki te kīngi; •  
ka ārahina ki a koe ngā wāhina, ōna takahoa e whai  
ana i a ia.
- 15 He hari, he koa ina kawea mai rātou; •  
ka tomo ki te whare o te kīngi.
- 16 Ko āu tamariki hei whakakapi mō ōu mātua; •  
ka meinga anō rātou e koe hei kāwana mō te whenua  
katoa.

- 17 Ka meinga e ahau tōu ingoa kia maharatia e ngā whakatupuranga katoa; •  
e whakamoemititia ai koe e ngā iwi ā ake ake.

**Te Rāwhitu tuarima, me ngā Rāpare/Tāite o te Whānautanga, Waiata 128**

- 1 Ka hari ngā tāngata katoa e wehi ana i a Ihowā, •  
e haere ana i āna ara.
- 2 E kai hoki koe i te mahinga a ōu ringa; •  
e hari koe, ā, ka tau te pai ki a koe.
- 3 E rite tāu wahine ki te wāina hua, i roto rawa i tōu whare; •  
āu tamariki ki ngā māhuri ōriwa, i ngā taha o tāu tēpu.
- 4 Nā, he pērā te manaaki mō te tangata •  
e wehi ana i a Ihowā.
- 5 Ka manaakitia koe e Ihowā i Hiona; •  
ā, e kite koe i te pai o Hiruhārama i ngā rā katoa e ora ai koe.
- 6 Āe, e kite koe i ngā tamariki a āu tamariki. •  
Kia mau te rongō ki a Iharaira!

**Te Rāwhitu tuaono, me ngā Rāmere/Paraire o te Whānautanga, Waiata 132**

- 1 E Ihowā, maharatia a Rāwiri, •  
me ōna mamaetanga ngākau katoa;
- 2 tāna oati ki a Ihowā, tāna kupu taurangi •  
ki te Mea Nui o Hākopa;
- 3 “E kore rawa ahau e tae ki tōku whare e noho ai ahau, •  
e eke rānei ki runga ki tōku moenga;
- 4 e kore ahau e tuku i ōku kanohi kia moe, •

- i ōku kamo kia neneuha,
- 5 kia kitea rā anō e ahau he wāhi mō Ihowā, •  
he nohoanga mō te Mea Nui o Hākopa.”
  - 6 Nā, i rangona e mātou ki Ēparata, •  
i kitea ki ngā māra o te ngahere.
  - 7 “Ka haere mātou ki roto ki ōna tapenākara; •  
ka koropiko ki tōna tūranga waewae.”
  - 8 E ara, e Ihowā, ki tōu okiokinga, •  
a koe, me te āka o tōu kaha.
  - 9 Kia whakakākahuria āu tohunga ki te tika, •  
kia hāmama tāu hunga tapu i te hari.
  - 10 Whakaaro ki a Rāwiri, ki tāu pononga, •  
kaua e whakapeaua atu te mata o tāu i whakawahi ai.
  - 11 Kua oati pono a Ihowā ki a Rāwiri, e kore ia e tahuri  
kē i tēnā: •  
“Ka whakanohoia e ahau tētahi hua o tōu kōpū ki tōu  
torōna.
  - 12 Ki te puritia e āu tama tāku kawenata, me tāku  
whakaaturanga e ako ai ahau ki a rātou, •  
ka noho anō ā rātou tama ki tōu torōna ake ake.”
  - 13 Kua whiriwhiria hoki e Ihowā a Hiona; •  
kua hiahiatia e ia hei nohoanga mōna:
  - 14 “Ko tōku okiokinga tēnei ake ake; •  
ko konei ahau noho ai, kua hiahiatia hoki e ahau.
  - 15 Ka manaakitia rawatia e ahau tāna kai; •  
ka whakamākonatia e ahau ōna rawakore ki te taro.
  - 16 Ka whakakākahuria hoki e ahau ōna tohunga ki te  
whakaoranga; •  
ā, ka hāmama tōna hunga tapu i te hari.
  - 17 Ka meinga e ahau kia pihi ki reira te haona o  
Rāwiri; •  
kua whakapaia e ahau he rama mō tāku i whakawahi

ai.

- 18 Ka whakakākahuria e ahau ōna hoariri ki te whakamā; •  
ā, ka matomato tōna karauna i runga i a ia.”

**Te Rāwhitu tuawhitu, me ngā Rāhoroi/Hatarei o te Whānautanga, Waiata 84**

- 1 Anō te ātaahua o ōu tapenākara, •  
e Ihowā o ngā mano!
- 2 E hiahia ana tōku wairua, āe, e hemo ana ki ngā marae o Ihowā; •  
e tangi ana tōku ngākau me ōku kikokiko ki te Atua ora.
- 3 Me te pīhoihoi hoki kua kite i tētahi whare, me te warou anō hoki i tētahi ōhanga mōna, hei takotoranga mō āna pī, arā, i āu āta, •  
e Ihowā o ngā mano, e tōku Kīngi, e tōku Atua.
- 4 Ka hari te hunga e noho ana i tōu whare; •  
he whakamoemiti tonu tā rātou ki a koe.
- 5 Ka hari te tangata ko tōna kaha nei kei a koe; •  
kei roto i ō rātou ngākau ngā huarahi ki reira.
- 6 Ka haere rātou rā te Raorao o Paka, ka meinga e rātou hei puna; •  
ngaro iho anō hoki ngā poka i te ua.
- 7 Ka haere atu rātou i te kaha ki te kaha; •  
ka kitea rātou ki te aroaro o te Atua i Hiona.
- 8 E Ihowā, e te Atua o ngā mano, whakarongo ki tāku īnoi; •  
tahuri mai tōu taringa, e te Atua o Hākopa.
- 9 Titiro mai, e te Atua, e tō mātou whakangungu rākau; •  
tirohia iho hoki te mata o tāu tangata i whakawahi ai.



- 10 Nō te mea, he rā kotahi i ōu whare, pai atu i ngā rā kotahi mano. •  
Te tiaki tatau i te whare o tōku Atua, pai atu ki ahau i te noho ki ngā tēneti o te kino.
- 11 He rā hoki a Ihowā te Atua, he whakangungu rākau; •  
ka hōmai e Ihowā te atawhai me te korōria. E kore e kaiponuhia e ia tētahi mea pai ki te hunga e tapatahi ana te haere.
- 12 E Ihowā o ngā mano, •  
ka hari te tangata e whakawhirinaki ana ki a koe.

*Waiata Whakamoemiti nā te Kawenata Tawhito  
ko tēnei*

### **Waiata Whakamoemiti tuatahi**

- 1 “E whakamanamana ana tōku ngākau ki a Ihowā,  
kua ara tōku haona i a Ihowā; •  
ka rahi tōku waha ki ōku hoariri, nōku ka koa ki tāu whakaoranga.
- 2 Kāhore he mea tapu, ko Ihowā anake; kāhore kē atu,  
ko koe anake; •  
kāhore anō hoki he kāmaka hei rite mō tō tātou Atua.
- 3 Kāti te whakanui i te kōrero whakahīhī; kei puta te  
whakapehapeha i ō koutou māngai; •  
he Atua mōhio hoki a Ihowā, ā, ka pāunatia e ia ngā mahi.
- 4 Whati ana ngā kōpere a te hunga mārohirohi, •  
ā, ko te hunga i tūtuki te waewae, ko te kaha hei whītiki mō rātou.
- 5 Ko Ihowā hei whakarawakore, ko ia hei  
whakawhiwhi ki te taonga; •  
māna e whakaiti, māna anō hoki e whakaara.
- 6 Whakaarahia ana e ia te iti i roto i te puehu, ara ana i  
a ia te rawakore i roto i te pūranga paru, •

ā, whakanohoia iho ki roto ki ngā rangatira, meinga ana kia whiwahi ki te torōna korōria. Nō Ihowā rā hoki ngā pou tūranga o te whenua; ā, whakanohoia iho e ia te ao ki runga.”

1 Hamuera 2.1-4, 7, 8

**Korōria ki . . .**

*ko tēnei rānei*

### **Waiata Whakamoemiti tuarua**

- 1    Ā, tērā e puta ake he wana i te take i a Hehe, •  
ā, ka whai hua tētahi peka e tupu ake i roto i ōna pakiaka.
- 2    Ka noho hoki te Wairua o Ihowā ki runga ki a ia, •  
te wairua o te whakaaro nui, o te mātauranga, te wairua o te whakatakoto whakaaro, o te kaha, te wairua o te mōhio, o te wehi ki a Ihowā;
- 3    ā, ko tāna e āhuareka ai ko te wehi ki a Ihowā. •  
E kore anō ia e whakawā i runga i tā ōna kanohi e kite ai, e kore anō e whakaaro ki tā ōna taringa e rongoi ai, ina rīria e ia te hē.
- 4    Engari ka whakawā ia mō ngā rawakore i runga i te tika; i runga anō i te tika tōna riri i te hē, he whakaaro nōna ki te hunga māhaki o te whenua; •  
he whiu nā tōna māngai tāna patu mō te whenua, ka whakamatea anō e ia te tangata kino ki te manawa o ōna ngutu.
- 5    Ka noho tahi anō te wuruhi rāua ko te reme, ka takoto tahi te reparo rāua ko te kūao koati; ko te kūao kau, ko te kūao raiona, ko te mea mōmona, kotahi anō rōpū; •  
ā, mā te tamaiti iti rātou e ārahi.
- 6    E kore rātou e tūkino, e kore anō e whakamate puta noa i tōku maunga tapu; •

nō te mea ka kapi te whenua i te mātauranga ki a Ihowā, anō ko ngā wai e taupoko nei i te moana.

*Ihāia 11.1-4, 6, 9*

**Korōria ki . . .**

## **Ngā Pānui Karaipiture**

*ko tētahi o ēnei pānui, ko tētahi nō te Maramataka o te tau rānei*

### **Te Rāwhitu tuatahi, me ngā Rātapu o te Whānautanga**

Nā, karangatia ana rātou e Īhu ki a ia, ka mea ki a rātou, “E mahara ana koutou, ko te hunga e kīa ana he kāwana nō ngā tauwi hei whakatupu rangatira ki a rātou; ko ō rātou tāngata rarahi hoki hei akiaki i a rātou. Otirā, e kore e pērā i roto i a koutou; engari, ki te mea tētahi kia whakatupu tangata rahi i roto i a koutou, me whakatupu kaimahi ia mā koutou. Ki te mea hoki tētahi o koutou kia whakatupu tino tangata, me whakatupu pononga ia mā te katoa. Kīhai nei hoki te Tama a te tangata i haere mai kia mahia he mea māna, engari, kia mahi ia, kia tuku hoki i a ia kia mate hei utu mō ngā tāngata tokomaha.”

*Māka 10.42-45*

### **Te Rāwhitu tuarua, me ngā Rāhina/Mane o te Whānautanga**

Nā, i puta te kupu a Ihowā ki ahau, i mea, “Kīanō koe i hangā e ahau i roto i te kōpū, kua mōhio ahau ki a koe, ā, kīanō koe i puta mai i te puku, kua whakatapua koe e ahau; kua whakaritea koe e ahau hei poropiti ki ngā iwi.” Nā, ka mea ahau, “Auē, e Ihowā, e te Atua, nanā, kāhore e taea e ahau te kōrero, he tamariki nei hoki ahau.” Anō rā ko Ihowā ki ahau, “Kaua e mea, ‘He tamariki ahau:’ nō te mea, ahakoa ko wai te hunga e ungā atu ai koe e ahau, me haere tonu koe, me kōrero hoki e koe ngā mea katoa e

whakahaua e ahau ki a koe. Kaua e wehi i a rātou; kei a koe hoki ahau hei whakaora i a koe,” e ai tā Ihowā.

*Heremaia 1.4-8*

### **Te Rāwhitu tuatoru, me ngā Rātū/Tūrei o te Whānautanga**

Ka mea a Īhu, “Ko koutou te whakamārama o te ao. E kore e ngaro te pā e tū ana i runga i te maunga. E kore hoki e tahuna te rama, e whakatūria ki raro o te mēhua, engari, ki runga ki te tūranga; ā, ka tīaho ki ngā tāngata katoa i roto i te whare. Waihoki kia tīaho tō koutou mārama ki te aroaro o ngā tāngata, kia kite ai rātou i ā koutou hanga pai, kia whakakorōria ai i tō koutou Matua i te rangi.”

*Matiu 5.14-16*

### **Te Rāwhitu tuawhā, me ngā Rāapa/Wenerei o te Whānautanga**

E mātau ana hoki koutou ki te aroha noa o tō tātou Ariki, o Īhu Karaiti, arā, i a ia e whai taonga ana, whakarawakoretia iho ana ia, he whakaaro ki a koutou, kia whai taonga ai koutou i tōna rawakoretanga.

*2 Koroniti 8.9*

### **Te Rāwhitu tuarima, me ngā Rāpare/Tāite o te Whānautanga**

Ka mea a Īhu, “Ki te karangatia koe e tētahi ki te mārena, kaua e noho ki te nohoanga rangatira, kei karangatia hoki e ia tētahi he nui atu i a koe. Engari, ka karangatia koe, haere, e noho ki tō muri rawa nohoanga. Mō te tae rawa mai o te tangata nāna koe i karanga, nā, ka mea ia ki a koe, ‘E hoa, neke ake.’ Ko reira hoki koe whai korōria ai i te aroaro o ngā tāngata e noho tahi ana koutou. Ki te

whakanui hoki tētahi i a ia, ka whakaititia; ki te whakaiti tētahi i a ia, ka whakanuia.”

*Ruka 14.8 10-11*

### **Te Rāwhitu tuaono, me ngā Rāmere/Paraire o te Whānautanga**

He teka ianei ko te nohopuku tēnei i whiriwhiria e ahau? Kia whakatangorotia ngā here a te kino, kia wetekina ngā paihere o te ioka, kia tukua te hunga e tūkinotia ana kia haere noa atu, kia wāwāhia e koutou ngā ioka katoa? He teka ianei ko te tuwha i tāu taro mā te tangata e mate ana i te kai, ko te mau mai ki tōu whare i ngā rawakore i peia atu? Kia hīpokina hoki te tangata e tū tahanga ana, ina kitea e koe; kia kaua hoki e huna i a koe i ōu kikokiko ake? Ko reira tōu mārama puta ai, ānō ko te pūaotanga, ka hohoro anō ōu mate te mahu; ka haere tōu tika ki mua i a koe, ko te korōria anō o Ihowā hei hiku mōu.

*Ihāia 58.6-8*

### **Te Rāwhitu tuawhitu, me ngā Rāhoroi/Hatarei o te Whānautanga**

I kī atu anō a Īhu ki a ngā Parihi, i mea, “Ko ahau te whakamārama o te ao; ki te aru tētahi i ahau, e kore ia e haere i te pōuri, engari, ka whiwhi ki te mārama o te ora.”

*Hoani 8.12*

### ***Te Waiata a te Puhi Tapu, a Meri***

Ka whakanui tōku wairua i te Ariki: •

e hari ana tōku wairua ki te Atua, ki tōku Kaiwhakaora;

Mōna i titiro ki te iti o tāna pononga: •

tā te mea hoki kātahi ahau ka kīia e ngā whakatupuranga katoa

e haere ake nei, he wahine hari.

He nui hoki ngā mahi a te Mea Kaha ki ahau: •  
he tapu hoki tōna ingoa.

He mahi tohu tāna ki te hunga e wehi ana ki a ia: •  
ki tēnei whakatupuranga, ki tēnei whakatupuranga.

Kua whakaputaina he kaha e ia, arā e tōna ringa: •  
nāna te hunga whakakake i marara ai, i te whakaaro  
o ō rātou ngākau.

Kua whakatakā e ia ngā piriniha i ō rātou torōna: •  
ā, whakateiteitia ake ana te hunga iti.

Kua whakakā e ia te hunga mate hiakai ki ngā mea pai: •  
kua tonoa kautia atu ana te hunga taonga.

Kua tautokona e ia a Īharaira, tāna pononga: •  
he whakamahara hoki ki tāna mahi tohu.

Ki a Āperahama rātou ko tāna whānau ake tonu atu: •  
pērā hoki me tāna i kōrero ai ki ō tātou mātua.

*Ruka 1.46–55*

**Kia whakakorōriatia te Matua, te Tama: •  
me te Wairua Tapu;  
ko te ritenga ia i te tīmatanga, ā tēnei anō ināiane: •  
ā ka mau tonu iho, ā ake ake. Āmine.**

*ko tēnei rānei*

**Korōria ki te Matua, ki te Tama,  
ki te Wairua Tapu; •  
mai i te tīmatanga, ki tēnei wā,  
ā, haere ake nei. Āmine.**

## **Ngā Īnoi**

*Ngā Īnoi takawaenga me ngā whakawhetai*

**E te Ariki, kia aroha mai.**

**E te Karaiti, kia aroha mai.**

**E te Ariki, kia aroha mai.**

*Te Īnoi mō te rā, te Īnoi mō te Rātū/Tūrei, te Īnoi mō te  
Haerenga Mai rānei*

### **Te Īnoi mō te Rātū/Tūrei**

E te Atua o te tūmanako, o te koa,  
whakapuaretia ō mātou ngākau ki te aroha,  
kia kite ai tāu Tama a Īhu Karaiti i tōna haerenga mai  
i tētahi kāinga kua whakaritea mai mōna i roto i a mātou;  
ko ia e ora ana, e kīngi tahi ana me koe me te Wairua  
Tapu,  
kotahi anō Atua, āianeī ā ake tonu atu.

**Āmine.**

### **Te Īnoi mō te Haerenga Mai**

Naumai, haere mai Emanuera,  
ko koe te huarahi, te pono me te ora;  
ko koe te aka pono, te taro o te ora.  
Haere mai, e te Kaiwhakaora,  
haere mai ki tō ao e tatari nei ki a koe.

**Āmine.**

## **Te Īnoi a te Ariki**

E tatari ana mō te taenga mai o te rangatiratanga o te Atua, ā,

kua akona nei tātou e tō tātou Ariki, ka ĩnoi tātou.

**E tō mātou Matua i te rangi**

**Kia tapu tōu Ingoa.**

**Kia tae mai tōu rangatiratanga.**

**Kia meatia tāu e pai ai**

**ki runga ki te whenua,**

**kia rite anō ki tō te rangi.**

**Hōmai ki a mātou āiane**

**he taro mā mātou mō tēnei rā.**

**Murua ō mātou hara,**

**Me mātou hoki e muru nei**

**i ō te hunga e hara ana ki a mātou.**

**Aua hoki mātou e kawea kia whakawaia;**

**Ēngari whakaorangia mātou i te kino:**

**Nōu hoki te rangatiratanga, te kaha,**

**me te korōria,**

**Ake ake ake. Āmine.**

**Kia tau ki a tātou katoa**

**te atawhai o tō tātou Ariki, o Īhu Karaiti,**

**me te aroha o te Atua,**

**me te whiwhinga tahitanga ki te Wairua Tapu,**

**ake ake. Āmine.**